

BELAJAR BAHASA ASING MELALUI DRAMA

Oleh: Asma' Salsabilla binti Mohamad Sayuzi, 1161238,
Fakulti Pengajian Bahasa Utama (FPBU), Universiti Sains Islam Malaysia (USIM)
Disiarkan pada 30 July 2020



Siapa kata tonton drama membuang masa? Hampir seluruh dunia menonton drama, malah aktiviti ini semakin mengambil tempat dalam dunia hiburan.

Industri drama amat membantu dalam meningkatkan ekonomi negara seperti yang berlaku di Korea Selatan, di mana bidang ini merupakan antara penyumbang utama dalam meningkatkan ekonomi mereka.

Menonton drama bukanlah memberi impak negatif sahaja, malah dari sudut positifnya, ia membolehkan kita mempelajari dan menguasai bahasa asing.

Berdasarkan artikel bertajuk Kesulitan Belajar yang ditulis Pensyarah Psikologi Universiti Widya Dharma Klaten, Yulinda Erma Suryani, seseorang individu itu akan lebih mudah dan cepat mengingat sesuatu dengan bantuan audio, visual dan simbol.

Berdasarkan kepada pengertian, drama pula adalah penceritaan yang memberi kesan kepada penonton secara visual.

Oleh itu, kita dapat memperolehi gaya bahasa yang pelbagai menerusi drama yang ditonton, sekali gus memudahkan kita mengingati bahasa tersebut.

Bukan itu sahaja, artikel bertajuk *Learning Languages through Drama* yang ditulis oleh Sarah L. Dodson dari Colorado State University membuktikan kelebihan pelajar-pelajar yang menonton adalah mereka akan memperoleh dan mengamalkan kosa kata baharu dan struktur tatabahasa.

Jika kita tidak mempunyai perbendaharaan kosa kata yang luas maka kita akan mengalami kesulitan ketika menggunakan bahasa terutamanya melalui lisan.



Tidak dinafikan lagi, kepelbagaian drama sangat membantu kita dalam menguasai bahasa asing dengan cepat dan mudah.

Hal ini kerana drama mempunyai pelbagai jenis genre seperti keharmonian, romantik, persahabatan, peperangan, pengembaraan dalam pelbagai bahasa seperti bahasa Arab, bahasa Inggeris dan bahasa Mandarin.

Selaras dengan kepelbagaian genre ini, kategori penonton juga terdiri daripada pelbagai lapisan umur seperti kanak-kanak, remaja dan dewasa.

Cara pertuturan yang baik dan jelas dalam drama akan memudahkan penonton memahami aspek penceritaan dengan baik lantas mendorong mereka menontonnya sehingga habis.

Jadi, secara tidak langsung mereka akan belajar cara penyampaian atau pertuturan yang baik, yang mana ia sangat membantu dalam mempelajari bahasa.

Setelah kita mampu menguasai bahasa asing dengan baik, kita juga yang beroleh faedahnya seperti memahami artikel atau bahan penulisan dalam bahasa asing tanpa memerlukan penterjemahan.

Sehubungan itu, manfaatkanlah hobi menonton drama asing untuk mengasah kemahiran dan mempertingkatkan penguasaan kita dalam bahasa-bahasa asing.